

आकाशवाणी

1. प्रधानमंत्री नरेन्द्र मोदी होरें इक बारी फही लोकें दा आहवान कीता ऐ जे ओह स्वदेशी चीजें गी अपनाने दे कन्नो-कन्नी सुन्ने दी गैर-ज़रूरी खरीद ते बदेशें च ब्याह-शादियां करने कोला बचन।
2. प्रधानमंत्री नरेन्द्र मोदी होर अज्ज नमीं दिल्ली च सुषमा स्वराज भवन च जल शक्ति मंत्रालय दे विभागी शिखर सम्मेलन दे समापन समारोह गी सम्बोधित करगंन।
3. प्रधानमंत्री नरेन्द्र मोदी होरें बिश्केक च आयोजित शंघाई सहयोग संगठन दे 26में शिखर सम्मेलन च आतंकी ढांचे गी पूरी चाल्ली नश्ट करने दा जोरदार आहवान कीता ऐ।
4. अमरीका ने ईरान च इस्लामिक रेवोल्यूशनरी गार्ड कोर- IRGC गी निशाना बनाइयै नमें सिरेया हमले शुरू करी दिते न।
5. नेपाल च 19 मिम्बरी भारतीय फोरेंसिक टीम ने हाड़ कारण प्रभावत लोकें दी पंछान च मदद करने लेई DNA नमूनें दी जांच ते विशलेषण करना शुरू करी दिता ऐ।
6. चाइना मास्टर्स सुपर 750 च अज्ज भारत दे 7 प्रमुख खडारी अपने अभियान दी शुरुआत करने जा'रदे न।

<><><><><><>

PM-Swadeshi

प्रधानमंत्री नरेन्द्र मोदी होरें इक बारी फही लोकें दा आहवान कीता ऐ जे ओह स्वदेशी चीजें गी अपनाने दे कन्नो-कन्नी सुन्ने दी गैर-ज़रूरी खरीद ते बदेशें च ब्याह-शादियां करने कोला बचन। प्रधानमंत्री होरें इक वीडियो स्नेह च लोकें गी आखेआ जे ओह बदेशे च छुट्टियां मनाने, दुए मुखें च जाइयै ब्याह-शादी करने ते सुन्ने दी गैर-ज़रूरी

खरीददारी करने थमां बचन। मोदी होरें GDP 7.8 फीसद दी विकास दर हासल करने पर देशवासियें गी बधाई दिती ते आत्मनिर्भरता गी बढ़ावा देने ते स्वदेशी उत्पादें दे इस्तेमाल पर मता बल देने दी लोड़ दस्सी। श्री मोदी होरें आखेआ जे आलमी सतह पर बनी दी यक्को-तक्की, जंगें- मुसीबतें ते आपूर्ति श्रृंखला च रुकावटें दे बावजूद भारत तेज़ रफ्तार कन्नै तरक्की करा'रदा ऐ।

<><><><><><>

PM -Jal Shakti

प्रधानमंत्री नरेन्द्र मोदी होर अज्ज नमीं दिल्ली च सुषमा स्वराज भवन च जल शक्ति मंत्रालय दे विभागी शिखर सम्मेलन दे समापन समारोह गी सम्बोधित करगंन। दंऊ दिनें दे इस सम्मेलन दा मुख उद्देश्य केन्द्र ते राज्यें बश्कार सहयोग गी बधाइयै टीम इंडिया दी भावना गी मजबूत करना ऐ। इस शिखर सम्मेलन च मुख तौरा पर चर्चा पानी सरबन्धि बुनियादी ढांचा योजनाएं दी समें-सिर अमलावरी- लोकें दी शमूलियत- सहयोग ते भागीदारी कन्नै Catch दा रेन अभियान गी मजबूती देना ते जल-जीवन मिशन दे तैहत ग्रामीण जल आपूर्ति योजना दा संचालन ते रख-रखाव करना ऐ।

<><><><><><>

PM -SCO

प्रधानमंत्री नरेन्द्र मोदी होरें बिश्केक च आयोजित शंघाई सहयोग संगठन दे 26में शिखर सम्मेलन च आतंकी ढांचे गी पूरी चाल्ती नश्ट करने दा जोरदार आहवान कीता ऐ। कल लग्गे दे इस सम्मेलन च प्रधानमंत्री होरें आतंकवाद दे खलाफ कुलसंसारी सतह पर इक-जुटता दी जरूरत पर जोर दिता। प्रधानमंत्री होरें साफ तौरा पर आखेआ

कि आतंकवाद गी जईं थमां खत्म करने लेई आतंकवाद लेई रपेया-पैहा उपलब्ध कराने आहलें- आतंकवाद लेई भर्थी ते सिखलाई देने आहलें- आतंकवादियें गी सुरक्षत आसरमें उपलब्ध कराने आहलें ते आतंकवाद दे कुसै बी चाल्ली दे समर्थकें ते मददगारें समेत पूरे तंत्र गी पूरी चाल्ली तबाह करना होग। मोदी होरें आतंकवाद गी दना बरदाश्त नैई करने ते इसी लेइयै दोगली नीति नैई अपनाने दी बी अपील कीती। कुसै देश दा नांs लैते विजन मोदी होरें आखेआ कि आतंकवाद गी अपनी सरकारी नीति दे तौरा पर इस्तमाल करने आहलें मुख्यें गी एह संदेश थोना लोइचदा कि आतंकवाद कुसै लेई रणनीतिक जरिया नैई ऐ।

<><><><><><>

US-Secret Talks

अमरीका दे वित्त मंत्री स्कॉट बेसेंट होरें आखएआ ऐ जे जी-20 मुख्यें दे वित्त मंत्रिणं दी बैठका दे दरान अमरीका ने ईरान दे मुद्दें पर चीन ते रुस दे कन्नै गुप्त ढंग्गै कन्नै चर्चा कीती। हालांकि उ'नें इब्बी चेतावनी दिती जे चीन ने होर्मुज जल डमरु मध्य गी परतियै खोलने च मदाद करने लेई कोई टकोहदी वचनबद्धता नैई जताई ऐ। बेसेंट होरें आखेआ जे ट्रम्प प्रशासन- ईरान दे खलाफ अपने आर्थिक अभियान लेई व्यापक अंतर्राष्ट्री समर्थन जुटाने दी कोशश करा'रदा ऐ। उत्तरी कैरोलिना दे एशविले च दंडु दिनें दी बैठक दे बाद उ'नें पत्रकारें गी आखेआ जे उ'नें रुस ते चीन दे कन्नै बड़े गै गुप्त ढंग्गै कन्नै गल्लबात कीती ते उ'नें गी लगदा ऐ एह चर्चा होर अगगे बधदी ऐ।

<><><><><><>

US-Iran Attacks

अमरीका ने ईरान च इस्लामिक रेवोल्यूशनरी गार्ड कोर- IRGC गी निशाना बनाइयै नमें सिरेया हमले शुरु करी दिते न। ईरानी मीडिया दे मताबक बंदर अब्बास- होर्मुज़ असालुएह- ज़िरोफ्ट- कोनाराक- केशमद्वीप- चाबहार- जास्क- सीरिक ते लावान इलाकें च धमाकें दी अवाज सुनी गई। उत्थे गै अमरीकी सेंट्रल कमान ने आखेआ ऐ जे उन्दी तरफा ईरानी सेना गी निशाना बनाइयै कीते गेदे हमले पूरे होई गे न। इस दरान वायु रक्षा खेत्तरें- बरुदी सुरंगें दी समर्थ आली थाहरें ते संचार केन्द्रें सनें केई प्रमुख थाहरें गी निशाना बनाया गेआ ऐ। इब्बी आखेआ गेआ ऐ जे IRGC दी तरफा होर्मुज़ जल डमरु च कारोबारी जहाजें ते अमरीकी सैनिकें पर हमले दिएं कोशशें दे बाद अमरीका ने हमले कीते। ईरान दे बदेश मंत्रालय ने आखेआ जे अमरीकी हमले च कुहेस्ताक शैहरा च ब्याह आले समारोह दरान इक घरै गी निशाना बनाया गेआ जेहदे च 4 लोकें दी मौत ते 50 शा मते लोक ज़ख्मी होई गे।

<><><><><><>

Nepal -DNA Samples

नेपाल च 19 मिम्बरी भारतीय फोरेंसिक टीम ने फोरेंसिक माहिरें कन्नै मिलियै हाल च आए दे हाड़ कारण प्रभावत लोकें दी पंछान च मदद करने लेई DNA नमूनें दी जांच ते विशलेषण करना शुरु करी दिता ऐ। भारतीय दूतावास ने दस्सेआ ऐ कि टीम ने घाटी दे खुमलटार क्षेत्र च नेपाल पुलिस दी केन्द्री फोरेंसिक लबाली ते राश्ट्रीय फोरेंसिक लबाली च विशलेषण ते जांच दा कम्म शुरु करी दिता ऐ। भारती माहिर हाड़ प्रभावत इलाकें सवां किट्ठे कीते गेदे DNA दे नमूनें दी प्रोसेसिंग प्रक्रिया च तेजी आहन्ने ते पीड़ितें ते लापता लोकें दी पंछान करने च मदद लेई उत्थू दे माहिरें कन्नै मिलियै कम्म करा'करदे ऐ। नेपाल च आए दा हाड़ दे बाद नेपाल गी सहायता प्रदान करने लेई

चला'रदे जतनें दे हिस्से दे तौरा पर भारतीय फोरेंसिक दल गी उत्थे तैनाक कीता गेदा ऐ।

<><><><><><>

China Masters Super

चाइना मास्टर्स सुपर 750 च अज्ज भारत दे 7 प्रमुख खडारी अपने अभियान दी शुरुआत करने जा'रदे न। पैहले रोज उन्नति हुड्डा दे बाहर होने ते एम.आर. अर्जुन-हरिहरन अमसका रुनन दे रटैर हर्ट होइयै हटने दे बाद अज्ज सब्भनें दी नजर किदाम्बी श्रीकांत ते लक्ष्य सेन दे चीनी ताइपे दे ची यू जेन ते कनाडा दे विक्टर लाई कन्नै इक्कलै-इक्कलै मकाबलें पर ऐ। एहदे इलावा मर्दे दे डबल्स मकाबले च सात्विक साईराज रंकी रेड्डी ते चिराग शेटी दा मकाबला मलेशिया दे कांग खाई शिंग ते जुनैद आरिफ कन्नै होग। इस्सै चाल्ली महिलाएं दे इक्कले-इक्कले मकाबले च देविका सिहाग दा मकाबला मसां-मसां ठीक 9 बजे बुलगारिया दी कलोयाना नाल्बांतोवा कन्नै शुरु होई गया ऐ। जिसले जे बड्डलै 10 बज्जियै 40 मिंटे पर तन्वी शर्मा दा मकाबला डेनमार्क दी अमालिया शुल्ज कन्नै होग। मिक्स्ड डबल्स अज्ज ध्रुव कपिला ते तनीषा क्रास्टो दी जोड़ी थाईलैंड दे टोनकिड सहेंग ते टोनरग सहेंग दी जोड़ी खलाफ खेड्डा रदे न जिसले जे रोहन कपूर ते रुत्विका शिवानी गाडे दी जोड़ी दा मकाबला चीनी ताइपै दे यू गुआन शिन ते ली चिया हिसन दी जोड़ी कन्नै होना तय ऐ।

<><><><><><>

LG -Security Review

उपराज्यपाल मनोज सिन्हा होरें इक उच्च सतह दी बैठक लाइए जम्मू-कश्मीर दी सुरक्षा स्थिति सरबन्धी कारवाइएं ते तयारिएं दा जायजा लैता। उ'नें सुरक्षा एजेंसिएं गी

हिदायत कीती जे ओह आतंकवादिएं दे नैटवर्क पर दबा बनान ते इस पेठा पैदा होई सकने आहली चुनौतियें कन्नै निबड़ने ते पूरे-पराते तंत्र दा सफाया करने लेई जत्नै गी होर तेज करन। उप-राज्यपाल होरें पुलस ते आम लोकें बश्कार सम्पर्क बदाने- बेहतर रिश्ते कायम करने ते शकैतें दा पारदर्शी- बिजन कुसै दा पक्ख लैते दे ते संवेदनशील तरीके कन्नै नबेड़ा करने दियां हिदायता दितियां। उ'नें सुरक्षाबलें गी नशीले पदार्थ दी तस्करी करने आहलें खिलाफ कारवाई तेज करने लेई आखेआ। अधिकारिएं गी हिदायत कीती गेई जे ओह साइबर चुनौतिएं- सोशल मीडिया- गलत सूचना ते ऑनलाईन ब्लैकमेलिंग पर तक्क रक्खने दियां हिदायतां दितियां। उपराज्यपाल होरें बक्ख-बक्ख सुरक्षा एजेंसिएं बश्कार तालमेल बेहतर करने लेई गलाया।

<><><><><><>